

Istorgia dal rumantsch en il Grischun II


Nus eran vegni en nossa historia dil romontsch ell'emprema part tochen 1250, la mort digl imperatur Friedrich ils II. Aschi ca. 2000 onns d'istoria dils lungatgs el Grischun vein nus pia gia tractau, schegie che mo 1250 da quels pertuccan directamein il romontsch. Mo en scadin cass resta buc ton pli per quei semester, silmeins quei che pertucca il temps ch'ei aunc da tractar: gnanc 800 onns pli. Persuenter vegn lu il material in pulit tect pli rehs, aschia che nus vegnin segir buc a vegnir tochen tiel temps dad oz cun l'istoria dil romontsch en quella secunda part. Effectivamein semida la posizun dil romontsch fundamentalmein ella mesadad dil 19avel tschentaner cun sia introducziun ella scola publica. Cun quei entscheiva lu era ina nova perioda dil romontsch cun in grond diember da problems specifics per lungatgs che duein vegnir duvrai en scola, sco la produczun da cudischs da scola cun novas tematicas e cunquei cun novas terminologias, la normaziun dall'ortografia per quels cudischs da scola, la creaziun da vocabularis e grammaticas per in diever normau dil lungatg ed auter pli. Cunquei ch'ils Romontschs han gest vuliu far quei en pliras versiuns, eis ei lu era iu fetg ditg, tochen ch'els ein vegni da crear il pli strict necessari, silmeins en duas versiuns, ferton che las regiuns pli fleivlas han lu buc dau damogn a quei pensum. Mo quei ei lu il tema d'in'otra part dall'istoria dil romontsch.

Cun la mort da Friedrich ils II, il davos imperatur Hohenstauffer, va in'emprema fasa da domnaziun totala tudestga sur dil territori dalla Rezia Curiensis, il territori ch'era aunc restaus a l'entschatta da quella perioda, 800 s.Ch., a fin. Cun el va era l'epoca dils "imperaturs romans da naziun tudestga" a fin, ina seria dad imperaturs ch'entscheiva cun Carli il Grond, in Franc che regia aunc sur la Tiara tudestga, la Frontscha, il nord da l'Italia e quei t'ec dalla Spagna ch'era en maun catolic. Il tetel d'imperatur va lu denton definitivamein vi sils regents tudestgs cun Otto ils I, vegnius encorunaus imperatur 962. Naven da quei mument tochen 1250 ei lu il retg tudestg era imperatur roman, perquei ch'il retg tudestg regia era sur l'Italia dil nord tochen giu tiel stadi papal, denton buc pli sur dalla Frontscha. Igl ei pia il reginavel franc digl ost, quel che Ludovic il Tudestg ha survegniu 843, che surpren igl imperi naven da 962 tochen 1250 e la mort da Friedrich ils II. Igl ei en principi il papa Innocenz ils III ch'interrumpa quella successiun, mo che lez sa era buc guder ditg sia victoria. Il grond profitader da quella lutga denter imperatur e papa ei Philip ils IV da Frontscha, ch'ha lu surpriu il domini ell'Italia. Ils retgs da Frontscha ein denton mai vegni da s'imponer sco imperaturs; p'èr Napoleon ha lu usurpau quei tetel. Il tetel sco tal ei restaus el territori tudestg, ei denton ualti ditg buc buc pli staus cumbinaus cun ina pussonza reala. Cu quella tuorna lu puspei, vala ella era mo per il territori tudestg, buc pli per l'entira Europa, sco quei ch'el valeva silmeins teoreticamein aunc tochen 1250.

Els territoris tudestgs, tiels quals era il Grischun s'udeva, ei la pussonza centrala svanida cumpletamein. Quei vacuum da pussonza ha menau ad ina massa da pigns contadis independents, ch'eran en uiara permanenta in encunter l'auter per engrondir lur territori. Aschi ditg ch'ei ha dau in imperatur, eran tut ils regents locals dependents da lez. Igl imperatur s'aveva intervegnir da tut temps en lur administraziun, sch'el era buc cuntents cun quella ni sch'ei deva reclamaziuns digl administratur cunfinont ni forsa schizun dils subdits. Cu quella istanza superiura ei curdada naven, ei era la pusseivladad da controlla e correctura da l'administraziun dils regents locals scurdada. Lezs ein lu era sedepurtai leusunter, buc mo el Grischun; el Grischun denton era. Quei ha lu era giu consequenzas per la situaziun lingui-

stica dil Grischun, deplorablamein buc positivas, sco quei che ins vess saviu spetgar. Mo en scadin cass ein ils Grischuns naven da quei temps per gronda part sez la cuolpa da da quei che succeda en lur tiara, perquei ch'els fan lu naven da cheu sez lur historia, schegie buc gest il pievel, mobein ils signurs. Quels ein bein aunc per gronda part tudestgs, cunzun ils uestgs, mo ei dat lu era pli e pli biars signurs indigens ch'entscheivan a trafficar el Grischun.

Igl εμπrem pia puspei il funs historic, sil qual l'istoria dil lungatg sespleiga lu. El Grischun deva ei entuorn 1250 dus gronds signurs territorials ed in'entira massa pli pigns. Ei dat ina carta da quels differents territoris en colur tier Friedrich Pieth ella Bündnergeschichte alla fin dil cudisch. Cheu ina versiun impitschnida ualti fetg da quella carta, mo ins vesa silmeins las colurs. La medema carta en format empau pli grond ei d'anflar sut Fegl 1¹.



Il dus gronds signurs eran igl **uestg da Cuera** ed ils **baruns da Vaz**. Agl uestg da Cuera s'udeva il territori tgjetschen, pia Cuera, lu ils Tschun Vitgs, ch'eran da gliez temps denton mo 4, perquei che Maiavilla resp. Maienfeld fageva buc part da quei territori aunc, sco vus vesis sissum la carta. Maiavilla era oriundamein territori dils Aspermonts, ch'era denton vgnius entras maridaglia tiel barun da Vaz ed ei perquei en blau silla carta. Agl uestg s'udeva plinavon surtut Surses e l'Engiadina'aulta. El veva era certs dretgs ell'Engiadina bassa; leu era sia pussonza denton contestada dils signurs da Matsch, ina dinastia locala dil Vnuost, cun lur casti gest sut il num 'Vintschgau'. En principi s'udeva era la Tumliasca, la Muntogna (Heinzenberg) e Schons agl uestg. Quels territoris veva el denton dau en meglers temps

¹ La carta deriva d'in artechel cul tetel *Zum Inhalt und zur Entstehung des Bündner Urkundenbuch*, 6: <https://www.gr.ch/DE/institutionen/verwaltung/ekud/afk/sag/dokumentation/digitaleVitrine/Documents/BUB%20Vitrine.pdf>. Igl original ei difficultus da copiar.

vinavon sco feud als da Vaz. Lezs han lu gest tractau quels territoris sco sch'els s'udessen ad els, perquei ein els lu era indicai silla carta cun blau, denton cun in ur tgietschen entuorn. Ils agens territoris dils baruns da Vaz eran la Partenza, Tavau, il Scanvetg, tut ils vitgs da Malix tochen Vaz sura e la Val d'Alvra.

Ei deva plinavon aunc entgins auters regents locals el Grischun cun territoris pli pigns, sco ils **baruns da Razén**, cun in territori bunamein violett silla carta. Quels vevan oriundamein mo Razén e Panaduz, han lu denton acquistau relativamein baul Domat e Favugn, denton era il cumin da Rueun e Schlans ella Surselva. Digl uestg han ei lu aunc engulau pli tard la Tumliasca e la Muntogna, che schon ils baruns da Vaz vevan engulau da lez. Lu deva ei aunc ils **signurs da Belmont**, che vevan Flem, la gronda part dalla Foppa e la Lumnezia, la part verda dil nord. La part verda dil sid udeva als **conts da Sax-Mesauc**, e la medema colur han quellus duas parts, perquei ch'els conts da Sax-Mesauc han artau 1390 il territori da Belmont sur ina feglia da lez, ch'in da Sax-Mesauc veva maridau. Lu ei aunc da numnar igl **avat da Mustér** cun sia Casa da Diu, en fuorma cuorta Cadi, il territori brin. Lez veva aunc certs dretgs ella Val d'Ursera, ch'el ha denton piars relativamein baul (1410). Lu deva ei aunc in pèr territoris pli pigns cun ina empau atgna historia, p.ex. Lags e Sevgein, oriundamein territoris che suttastevan directamein agl imperatur, lu Haldenstein, che veva era in status special, e Tarasp ell'Engiadina bassa, ch'era in domini liber, ch'ei lu vegnius cumpraus pli tard dils Austriacs. Pia in entir diember da signurs gronds e pigns, praticamein tuts dano igl uestg ed igl avat da Mustér cun in pign territori da tschep agen ed il rest territori cumprau, ni aunc pli savens engulau.

Che quei saveva buc ir bein, sch'ins surschava quella genira a sesez, era da prever. Tochen ch'ei deva la pussonza centrala digl imperatur, saveva negin engrondir siu territori senza il consentiment da lez; el vess anzi stuiu quintar da spiarder tut, sch'el vess giu mustgas da far enzatgei en quella direcziun. Encuter l'armada digl imperatur vess el giu neginas schanzas, cunzun che lez vess saviu cumandar a tut ils vischins da dar schuldada ad el encuter il rebel. Mo inaga che la pussonza centrala ei stada naven, eis ei lu praticamein vegniu immediat tier uiaras internas el Grischun, igl emprem surtut denter ils dus regents locals ils pli pussents: igl uestg da Cuera ed ils baruns, pli tard conts da Vaz. Gia 1255 ei igl uestg da Cuera selamentaus tiel papa, ch'els baruns da Belmont ed auters signurs locals hagian priu naven ad el territoris. Il papa, ch'era en sesez la cuolpa da quella miseria, perquei ch'el veva scommunicau igl imperatur ord motivs politics, ha denton era buca saviu far enzatgei. El veva numnadamain era gia piars sia pussonza als retgs da Frontscha, ch'el veva clamau per liquidar ils imperaturs tudestgs. Perquei ei igl uestg lu setenius el futur plitost cun l'Austria, ch'era la pussonza vegnenta sper la Frontscha. Ses adversaris, ils baruns da Vaz, ein lu prontamein seligiaj culs pli gronds adversaris da l'Austria, ils treis cantuns primitivs dalla Svizra, Uri, Sviz e Sutsilvania. Naven da quei temps han ils Grischun lu adina giu da far cun l'Austria tochen 1803, cu ch'il schinumnu 'Stadi dallas Treis Ligias' ei daventaus in cantun svizzer. Mo aunc 1815 leva ina ferma partida el Grischun puspei far in agen stadi ord il Grischun cun agid da l'Austria. L'Austria leva denton ver ruaus ed ha perquei dau il Grischun alla Svizra ed ha persunter astgau salvar la Valtellina, ch'ella ha lu era giu, tochen ch'els Talianers han puspei priu naven ella ad els.

Il barun Donat da Vaz han bein gudignau differentas battagliais encunter igl uestg e ses gidonters austriacs, ei denton morts 1337 senza vegnentsunter masculin. Perquei ein sias

tiaras vegnidadas partidas denter sias duas feglias. Ina mesadad ei vegnida enta mauns als **conts da Toggenburg**, l'otra als **conts da Werdenberg-Sargans**, ils dus schienders da Donat da Vaz. Cun quei ei lu igl uestg staus a métsch. Persuenter suonda lu ina uiara dils da Werdenberg encunter quels da Belmont. Cun quella caschun ei la Foppa vegnida devastada; ils da Werdenberg ein denton vegni terrai sil Mundaun a S.Carli, cu ch'ei levan attaccar la Lumnezia. Quella battaglia ei enconuschenta ozildi sco battaglia da **Porclas**, 1352. En verdad ei denton schabegiau absolutamein nuot a Porclas quei onn. Pieth scriva en sia Bündnergeschichte leutier: "Die Überlieferung von der hervorragenden Teilnahme der Lugnezer Frauen am Kampfe ist nicht erwiesen und scheint erst neueren Ursprungs zu sein." Da Porclas viaden pudev'ins buc cun in'armada da quei temps, e segir buc senza ch'ins vess viu quei giu da S.Carli! En scadin cass ein ils patruns dalla Lumenzia, ils da Belmont, semussai renconuschents, ch'ils Lumnezians han spindrau lur signeradi en quella battaglia, aschia che quella regiun ha saviu prospeperar detg bein el 15avel e 16avel tschentaner. En Surselva ei lu era la Lumnezia la regiun catolica dominonta a l'entschatta dalla tradiziun dil sursilvan el 17avel tschentaner, sco nus vegnin aunc a veser.

In pèr onns pli tard entscheivan lu las **dispetas da Razén** denter igl uestg ed ils baruns da Razèn, ch'han cuzzau da 1387-1414, cun differents intervals denteren per serecuvrar empau. En quellas dispetas mava ei emprema lingia pervia dalla Tumliasca. Quei era ed ei aunc adina la cuntrada la pli fritgeivla dil Grischun. Da l'otra vart era ei denton er in territori fetg lucrativ pervia dils dazis alla via dil Gelgia e dil Spligia. Quellas uiaras han ruinau quella cuntrada dil tuttatg, denton era aunc tangau la Muntogna ed Il Plaun. Quellas regiuns han duvrau ualti ditg da serevegnir puspei. Igl ei perquei buc da smarvegliar, sch'ellas giogan mo sporadicamein ina rolla a l'entschatta dalla tradiziun scretta dil romontsch.

Quellas dispetas internas han giu per consequenza che la populaziun dallas regiuns pertucadas ei vegnida pli e pli paupra. Usualmein vegneva arsentau ils vitgs e spatitschau ils ers tier talas attaccas, semplamein empruau da far ton donn sco pusseivel el territori digl inimitg. Quei ha lu era sminuiu las entradas dils signurs; da gliud ch'ha nuot san ins era buc trer en taglias resp. dieschmas, sco quei che las taglias vevan num da quei temps. La finala han il signurs buc saviu pagar pli schuldada da professiun. Els han lu empruau in temps da far lur uiaras privatas cun ils agens subdits sco schuldada. Per quei intent han ins secapescha stuii mussar a quels, co ir entuorn cun armas. Inaga ch'ei han giu empriu quei, han ei lu beingleiti era duvrau lur armas encunter lur agens signurs, sch'ei fageva da basegns. Quei ha lu menau alla **Fundaziun dallas Treis Ligias**, fundadas per part ensemen culs signurs che vevan ferdau la puorla, per pli gronda part denton clamein encunter lezs.

L'emprema Ligia ch'ei vegnida fundada ei stada la **Lia da la Chadè**, sco quei ch'ils pertuccai han numnau ella. *Chadè* ei *Cadi* per surs. Quei fuss pia per surs. la 'Ligia dalla Cadi', mo per buc ch'ei detti scumbegls culla Cadi din ins perquei 'Ligia dalla Casa da Diu' per surs., quei che significhescha denton en sesez il medem sco Cadi. Ella ha num aschia, perquei ch'igl ei ina Ligia che cumpeglia ils territoris che s'udevan agl uestg. Ils territoris ils pli impurtonts digl uestg eran, sco nus vein viu, Cuera e conturon, Surmir e l'Engiadina, surtut l'Engiadin'aulta. La Ligia ei lu era vegnida fundada **1367** sin incitaziun da Cuera e sedrezza encunter igl uestg da lu, Pieder da Boemia. La Boemia ei ella Tschechia actuala. Da quei temps fageva ella aunc part digl imperi tudestg, mo gest fetg datier da Cuera era quella regiun secapescha buc. Pieder da Boemia era lu er il bia dil temps egl exteriur e veva dau ora cun quella ca-

schun in pulit tec dapli che quei ch'igl uestgiu veva. Cu ch'el era els deivets tochen culiez, ha el liu surschar l'administraziun dils beins digl uestgiu als Austriacs per in summa annuala considerabla. Quei ei vegniu enconuschent, e la Ligia ei vegnida fundada en emprema lingia per sfurzar igl uestg da revocar quei contract. Cun quella caschun han ins lu aunc restrenschiu generalmein las pusseivladads digl uestg da vender siu territori. Ils auters dretgs digl uestg, sco la giurisdicziun ni igl incasso da taglias, ein denton buc vegni tangai. Lezs ein lu vegni mess en damonda fundamentalmein pér a l'entschatta dalla reformaziun culs artechels da Glion da 1526. Igl uestg ha era giu vinavon il dretg da tschentar il mistral en tut ils cumins che fagevan part dalla Ligia. La Lia dalla Chadè ei pia mo ideologicamein ina midada radicala en quei senn, che ils subdits lain buc plascher tut pli, quei che lur signurs decidan. Politicamein semida directamein buc la massa aunc. Mo igl ei era clar, che quei ei l'entschatta dalla fin dalla pussonza aristocrata tradiziunala el Grischun.

Sin tut in'otra via ei la 'Ligia grischa' ni **Ligia dalla Part sura**, sco quei ch'ella veva num igl emprem, vegnida fundada. Fertion ch'igl ei tier la Lia da la Chadè claramein ils subdits che seligian senza il consentiment da lur signur, igl uestg, e directamein encunter ina decisiun da lez, eis ei ella Ligia Grischa ils signurs locals sezs ch'ei la basa dalla Ligia. Era lezs vevan numnadamein tut interess da vegnir tier temps pli ruasseivels per buc ir bancrut dil tut. Ina da lur pli impurtontas entradas eran ils dazis da transit tras lur territori, ed il transit veva calau dad ir tras il Grischun, perquei ch'ins era mai segirs da buc vegnir a mauns alla schuldada d'in da quels signurs ch'era gest vi dil far uiara enzanua. En in tal cass riscav'ins da spiarder tut la rauba ch'ins veva da transportar, e perquei untgev'ins sin rutas pli segiras, sco p.ex. quella dil Gottard. Per segirar quellas entradas stueva ins saver garantir, ch'ins saveva ir l'entira ruta senza quella resca. Perquei han ils signurs pertuccai fatg il contract da **Glion** da **1395**. Gia en quella cuvegna ein denton buc mo ils signurs numnai, mobein era lur gliued, en scadin cass quels dalla claustra ed il Lumnezians. Igl ei denton ina cuvegna denter signurs, probablamein fatga sut ina certa pressiu dil pievel. Lez ha denton segir giu da dir nuot tier la formulaziun dil contract sco tal. La cuvegna pertucca era aunc per dabia buc igl entir territori dalla Ligia grischa da pli tard, mobein mo la part sura da quella, la Surselva, e Razen. El decuors dils proxims onns ein denton aunc plirs signurs e lur possess vegni vitier: Trin, Tumein, Rehanau, lu Sursaissa e Val, pia ils Gualsers sursilvans, Flem, anteriur possess dils da Belmont, e Laax, che veva in status special e s'udeva directamein agl imperatur. Perquei han ins lu stuiu renovar la cuvegna 1424 a Trun, schegie strusch sut igl ischi, mobein ella Cuort dalla claustra in toc plinanen. Cun quella caschun ei la Ligia vegnida slargiada sil territori dalla Muntogna, Schons e Valragn. Quels da Schons e Valragn eran denton separticipai alla Ligia grischa senza lubientscha da lurs signurs, ils conts da Werdenberg-Sargans. Lez han lu, a caschun d'ina midada da successiu, aunc empruau **1452** da puspei vegnir en possess dalla Muntogna e Schons, ch'ei vevan artau dils conts da Vaz. Igl uestg e Gieri da Razén vevan fatg in patg cun quels e schau ir els tras lur territori. Quella Ligia digl uestg e dil barun da Razén culs conts da Werdenberg-Sargans ha survegniu il num **Ligia nera**, perquei ch'ils signurs purtavan vestgadira nera da quei temps e buc grischa, sco ils subdits. Gieri da Razén veva rut cun quei il patg cun la Ligia grischa. Ils Sursilvans e Gualsers ein denton vegni en agid ad uras als da Schons, aschia ch'ils conts da Werdenberg-Sargans ein vegni terrai malamein e vegni persequitai tochen a Sargans. Il barun Gieri da Razén duein ils purs ver pigliau avon ch'el vegni da mitschar en siu casti a Razén e ver menau el a Valendau per truar el leu alla mort, mo el ei lu vegnius da mitschar. Ina versiun, co che quei vess saviu ir, san ins leger en ina renumada poesia da Muoth cul tetel "La der-

tgira nauscha da Valendau"². Mo quei ei lu stau la fin definitiva da quellas uiaras internas dils ed encunter ils signurs feudals, e la Ligia dalla Part sura ha saviu cumprovar cun quella caschun sia valur.

Puspei plitost encunter lur signurs feudals ed era per buc vegnir sut domini austriac ei lu aunc la **Ligia dallas 10 Dertgiras** vegnida fatga igl onn **1436**. Mo cunquei che lezza cumpeglia actualmein negin territori romontsch pli, seigi ella per castitg mo gest numnada.

Ils contacts denter quellas treis ligias ei staus igl emprem temps mo informativs. Quels contacts han lu denton menau cul temps a patgs vicendeivels denter duas Ligias. 1450 ha la Ligia dallas 10 Dertgiras p.ex. fatg in tal patg culla Lia da la Chadè, e 1471 lu era cun la Ligia grischia, il renumau patg da Vazerol. Cun quei eran tuttas treis Ligias colligiadas silmeins indirectamein ina cun l'autra. Perquei vala 1471 magari era sco entschatta dil Stadi dallas Treis Ligias. En scadin cass ein quels patgs lu secumprovai in'emprema gada, cu ch'igl ei iu per spindrar il status quo encunter igl imperatur Maximilian da l'Austria, che leva puspei integrar il Grischun e la Svizra egl imperi. Lez ei lu vegnius battius **1499** da schuldada da tuttas Treis Ligias a caschun dalla **battaglia dalla Chalavaina**. In patg costituziunal denter tuttas Treis Ligias ei lu denton vegnius fatgs pér **1524** a Glion; da quei mument san ins lu tschintschar dil **Stadi dallas Treis Ligias**. Quei patg era vegnius necessaris pervia da l'administraziun dalla tiara subdita comunabla, la Valtellina. Lezza era vegnida occupada da gliued da tuttas treis Ligias 1512, e quella occupaziun era vegnida sancziunada quater onns pli tard en in contract da pasch cul retg da Frontscha, che veva da quei temps gest il domini sur da l'Italia dil nord. Cu lez ha piars pauc pli tard puspei quei domini, ei quei contract vegnius contestaus dils novs patruns da l'Italia dil nord, ed ei ha lu era dau novas battaglias per la Valtellina, ch'ils Grischuns han la finala gudignau, buc senza ina terrada ni l'autra.

Aschi lunsch pia ina survesta sur dils eveniments historics ils pli impurtonts da quella perioda. Quella situaziun politica ha era giu consequenzas per il svilup dil romontsch. L'emprema ei, che las differentas regiuns dil Grischun han entschiet a sesviluppar independentamein ina da l'autra, tut tenor tgei relaziuns politicas e culturalas ch'ellas vevan. Il meglier eis ei iu cun l'Engiadin'aulta. Lezza suttasteva agl uestg, mo lez seschava representar en praticamein tut las fatschentas auter ch'ella giurisdicziun aulta ni giurisdicziun da saung mintgamai d'in representant dils Plantas da Zuoz, pia d'ina famiglia indigena. Ils Plantas eran da casa ano buc pli nobels ch'ils auters indigens; ei han denton survegniu entras quei uffeci tec a tec ina posiziun dominonta. Cunquei ch'els vivevan ella tiara ch'ei administravan, eran ei datier dalla populaziun e savevan reagar ad uras sin eventualas malcontententschas da quella. L'Engiadin'aulta ei perquei era stada cumpigliada mo agl ur dallas dispetas ed uiaras per la pussonza el Grischun. En scadin cass ein quellas buc succedidas sin siu territori, cun tut las destrucziuns e devastaziuns dil territori ch'accumpignavan mintgamai quellas uiaras. Aschia ha ella saviu sesviluppar ruasseivlamein e cuntinuadamein, ed igl ei lu buc da smarvegliar, ch'ella ei l'emprema regiun che fa diever dil romontsch en scret a l'entschatta dil 16avel tschentaner. Meglier ch'ei va cun ina tiara ni cun ina regiun e pli tgunsch ch'ella sa aunc far enzatgei per la cultura. Tochen a l'entschatta dil 20avel tschentaner ei l'Engiadina aulta la regiun romontscha dominonta. Pér entuorn 1930 ha ella stuiu ceder quella rolla alla Surselva, dad ina vart pervia dalla atgna germanisaziun entras il turissem, da l'autra vart pervia

² LEO TUOR (ed.), *Giacun [C]asper Muoth, Poesias 1*, 31-38.

dalla unificaziun ortografica ella Surselva sezza, ch'ha augmentau il diember da quels che duvravan il sursilvan sco lungatg da scartira en in plum per ina tiarza. Mo quei s'auda lu schon tiel tema 'Il romontsch el 20avel tschentaner' e buc tier ils temas che nus tractein en quei capetel.

Las autras regiuns romontschas actualas han buc giu ton cletg. Relativamein pauc aud'ins da Surmeir da quei temps, aschia che quella regiun sto era ver giu pli u meins ruaus. Eventualmein s'udeva ella insumma aunc ensemen cun l'Engiadin'aulta dil temps dallas uiaras dils baruns ed ha survegniu pér pli tard agens administraturs. La gliesta dils administraturs el 'Codesch dal Cumegn da Savognin' numna igl empren administratur pér pigl onn 1440. Igl ei bein buc dil tut segir, che quei ei efectivamein igl empren, mo en sesez tuttina fetg probabel. In pulit temps ei il Surmir en scadin cass vegnius regiun da Zuoz ano, quei ch'ha lu era giu consequenzas per il svilup dil romontsch en quellas duas regiuns, sco nus vegnin lura aunc a veser. Ellas han efectivamein svilups linguistics comunabels che differenzieschan quellas duas regiuns dallas duas regiuns agl ur, l'Engiadina bassa e la Surselva, mo da quei lu aunc pli tard.

Clara era la situaziun en sesez era ella Cadi, che s'udeva alla claustra da Mustér. Difficultads ha ei denton dau als cunfins dalla Cadi, p.ex. ella Val d'Ursera dad ina vart, el cumin da Rueun da l'autra vart. Il cumin da Rueun s'udeva als baruns da Razén, che vessen magari giu mustgas da slargar lur territori empau. Dil pugn da vesta dil svilup dil lungatg veva la Cadi denton il grond dischavantatg, che siu signur, igl avat da Mustér, ei bunamein adina staus in tudestg, aschia ch'el ha buc saviu dar impuls per il diever dil romontsch. Quei che pertucca texts giuridics ei la Cadi p.ex. ualti la davosa regiun romontscha che va da texts tudestgs a texts romontschs, per la legislaziun da cumin p.ex. pér a l'entschatta dil 19avel tschentaner.

Buc aschi bein eis iu cun l'Engiadina bassa, ch'ei stada dispitada bunamein traso, igl empren denter igl uestg ed ils conts da Matsch. Pli prigulusa ei la situaziun lu vegnida, inaga ch'ils conts dil Tirol, ils Habsburgs, han survegniu ils dretgs reals ni imaginai dils conts da Matsch. Cuort avon la battaglia da Chalavaina vevan ils Austriacs empruau da conquistar l'Engiadina bassa, e pauc suenter la battaglia da Chalavaina han ei aunc empruau inagada quei. Gia vi da quei ves'ins, che la victoria da Chalavaina ei stada fetg relativa; igl onn suenter eran ils Austriacs puspei ell'Engiadina. Mo lezza gada ein ei lu vegni viaden ella neiv, han anflau negin proviant pli ell'Engiadina, perquei ch'ils Engiadines vevan zuppau quel ed eran scappai sezs siaden els cuolms, aschia ch'igl ei restau nuot auter ad els che da seretzer anavos ell'Austria. Sin quei viadi ei in bien ton da quella truppa morta da fom e freid, aschia ch'ei ha lu dau ruaus per in cert temps era ell'Engiadina bassa. La regiun che ha pitu il pli fetg da quellas uiaras ei denton segir la Tumbleasca stada; quella regiun vegneva sblundergiada traso puspei, inaga da quels ed ina ga da tschels.

Aschi lunsch pia ina survesta historica dallas dispetas el Grischun da quei temps, las emprovas da vegnir tier relaziuns pli stablas entras differentas Ligias e las consequenzas da quei funs historic.

Lu mein nus definitivamein tier la historia dil romontsch duront quella perioda. Entras quella divisiun dalla pussonza el Grischun entscheivan las regiuns a sviluppar in'atgna dinamica,

buc mo politicamein, mobein era linguisticamein. Ins sa supponer ch'il romontsch era entuorn 1250 aunc in lungatg relativamein uniform, silpli cun pintgas differenzas lexicalas e forsa ina ni l'otra ella morfologia dils verbs. Praticamein tut ils svilups fonetics e morfologics che differenzieschan numnadamein el 16avel tschentaner e surtut ozildi ils differents idioms, ein svilups ch'ei succedi pér suenter 1250. Il romontsch entscheiva pia a far il medem svilup sco il latin vulgar 850 onns pli baul suenter il declin dalla pussonza centrala egl imperi roman: el entscheiva a sedifferenzias pli e pli fetg da regiun tier regiun. Ina administraziun centrala stabilisescha adina in lungatg, perquei ch'ella derasa la medema fuorma da lungatg sur igl entir intschess. Quella fuorma survegn cheutras in character official e cun quei in prestige pli ault visavi eventualas autras fuormas, aschia ch'ils plidaders ch'enconuschan domisduas prefereschan la fuorma officiala, en scadin cass cu ch'ei va per caussas officialas. Quei funcziuna era aunc oz buc bia auter, mo ch'il lungatg d'administraziun dil cantun ei il tudestg, cul resultat che la gronda part dils Romontschs silmeins drova era quei lungatg per tut las caussas officialas. En quei mument che l'administraziun centrala scroda, dat ei denton negin motiv pli da recuorrer ad autras fuormas che quellas ch'ins drova sez sco native speaker. Eventualas midadas da lungatg regionalas e localas vegnan naven da quei mument buc pli corrigidas entras la confruntaziun cun fuormas surregionalas e san perquei sesviluppar senza impediments. Cunquei ch'il lungatg ei in sistem fetg complex cun colligiazions interlingualas fetg subtilas, sa in svilup linguistic provocar entiras reacziuns da cadeina, aschia ch'igl entir sistem vegn en moviment e sa lu era sesviluppar relativamein spert. En rodund 200 onns san ins lu vegnir tier in stadi da lungatg fetg different da quel dil punct da partenza. In svilup analog ei en sesez era succedius el tudestg duront il medem temps. Il tudestg medieval resta relativamein stabils denter 1050 e 1300. Lu sefa denton la munconza d'in centrum era sentir el territori tudestg, aschia ch'il lungatg vegn era leu en moviment. Naven da 1300 semida il tudestg lu radicalmein enteifer ils proxims 200 onns. Era leu dat ei ina fracziunalsaziun dialectala dil lungatg. 1518, cu Luther entscheiva a publicar ils emprems texts per tudestg, drova el tut in auter lungatg ch'il tudestg medieval. Naven da quei mument dat ei lu denton el tudestg ina cunterpeisa al svilup nuncontrollau dil lungatg. Il lungatg da scartira da Luther vegn surprius tec a tec sco model pil lungatg da scartira tudestg el decuors dil 16avel tschentaner e stabilisescha cun quei puspei il svilup linguistic. El romontsch dat ei negina correctura da quella divergenza dialectala, aschia che las differenzas sefixeschan lu el 16avel e 17avel tschentaner e vegnan per part era aunc pli grondas els tschentaners che suondan. Igl ulteriur svilup dil lungatg vegn denton era in pulit tec pli plauns el romontsch, silmeins leu, nua che quel vegn era duvraus sco lungatg da scartira. Las differenzas denter las regiuns vegnan denton era aunc ella proxima perioda pli grondas e buc pli pintgas, perquei ch'ei dat negina varianta da lungatg che procurass puspei per ina convergenza. Tier ils detagls ed il sistem d'argumentaziun vegnin nus lu aunc l'otra gada.